



PERINTAH ULUNG
PANGLIMA ANGKATAN TENTERA KE-20

BISMILLAHIRRAHMANIRRAHIM.

ASSALAMUALAIKUM WARAHMATULLAHI WABARAKATUH DAN SALAM SEJAHTERA.

SEGALA PUJI-PUJIAN HANYALAH UNTUK ALLAH SUBHANAHU WATAALA; TUHAN SEKELIAN ALAM; SELAWAT DAN SALAM KE ATAS JUNJUNGAN BESAR NABI MUHAMMAD SALLALLAHU ALAIHI WASSALLAM.

PARA PERWIRA, BINTARA, PETANDA DAN PERAJURIT SERTA WARGA ANGKATAN TENTERA MALAYSIA YANG SAYA KASIHI SEKALIAN,

ALHAMDULILLAH, HAMBAMU INI MENTASLIMKAN RASA KESYUKURAN DAN SEGALA PUJI-PUJIAN BAGI MU YA ALLAH ATAS KURNIAAN MANDAT SELAKU PANGLIMA ANGKATAN TENTERA YANG KE-20. YA RABBUL JALIL, KAU KURNIAKANLAH IHSAN DAN HIKMAH KEBIJAKSANAAN, MOGA-MOGA TUGAS BERAT YANG HAMBA MU GALAS INI SENTIASA MENDAPAT PETUNJUK DAN IBRAH, AGAR

DUKUNGAN PRINSIP “**YANG HAK TETAP DITEGAK, YANG BATIL KEKAL DISANGKAL**” BERJAYA DILUNAS DALAM MENGGANGKAT MARTABAT ANGKATAN TENTERA MALAYSIA KE TAHAP YANG SELAYAKNYA.

DI KESEMPATAN INI JUA, SAYA INGIN MENJUNJUNG SETINGGI-TINGGI KASIH KEPADA KE BAWAH DULI YANG MAHA MULIA SERI PADUKA BAGINDA YANG DIPERTUAN AGONG SELAKU PEMERINTAH TERTINGGI ANGKATAN TENTERA MALAYSIA, ATAS LIMPAH PERKENAN KE ATAS PELANTIKAN SAYA. JUTAAN TERIMA KASIH JUGA SAYA UCAPKAN KEPADA PIHAK KERAJAAN, KHUSUSNYA YANG AMAT BERHORMAT PERDANA MENTERI MALAYSIA DAN YANG BERHORMAT MENTERI PERTAHANAN KERANA MEMBERIKAN KEPERCAYAAN PENUH KEPADA SAYA UNTUK MEMIMPIN KETUMBUKAN ANGKATAN TENTERA MALAYSIA YANG MERUPAKAN BENTENG PERTAHANAN NEGARA.

SEJUJURNYA, SAYA MELIHAT PELANTIKAN INI SEBAGAI SATU **TAKLIF** IAITU AMANAH DAN BEBAN SYARIAT YANG SUDAH PASTI SANGAT LUAR BIASA CABARANNYA. OLEH ITU, SAYA AKAN SENTIASA SEMATKAN DALAM SANUBARI BAHAWA KEGAGALAN MENUNAIKAN AMANAH ITU BAKAL MENATIJAHKAN RISIKO HUKUMAN UKHRAWI YANG BERAT KEPADA DIRI SAYA SENDIRI. MULAI SAAT INI, SAYA JUGA INGIN MELAFAZKAN SUMPAAH JANJI BAHAWA JAWATAN INI TIDAK SAMA SEKALI MENJADI SATU **TASYRIF** AGAR SAYA TIDAK TERJERUMUS DALAM GELUMANG PENYAKIT BANGGA DIRI DAN KEALPAAN. JUSTERU ITU, SAYA BERTAWAKKAL DAN TIADALAH TEMPAT LAIN UNTUK SAYA MEMOHON PERTOLONGAN KECUALI KEPADA ALLAH SUBHANAHU WATAALA.

SAUDARA – SAUDARI YANG SAYA HORMATI SEKALIAN,

BERSEMPENA DENGAN HARI YANG BERSEJARAH INI, SAYA SERTA SELURUH WARGA ANGKATAN TENTERA MALAYSIA INGIN MERAKAMKAN SETINGGI-TINGGI PENGHARGAAN DAN JUTAAN TERIMA KASIH KEPADA **YANG MULIA JENERAL TAN SRI RAJA MOHAMED AFFANDI BIN RAJA MOHAMED NOOR, MANTAN PANGLIMA ANGKATAN TENTERA** YANG TELAH BANYAK MENYUMBANG PENGORBANAN, CURAHAN BAKTI DAN KERINGAT DALAM MENGEMUDI ANGKATAN INI. SESUNGGUHNYA KHIDMAT BAKTI, JASA DAN BUDI BAIK YANG MULIA JENERAL TAN SRI RAJA MOHAMED AFFANDI AMAT KAMI SANJUNGI DAN AKAN DIKENANG SENTIASA. DALAM KONTEKS YANG SAMA, SAYA JUGA KOMITED UNTUK MENGEMBLENG SEGALA USAHA, KUDRAT DAN BUAH FIKIRAN DEMI MENERUSKAN KECEMERLANGAN YANG TELAH DILAKARKAN OLEH PARA PIMPINAN ANGKATAN TENTERA MALAYSIA YANG TERDAHULU, INSYA ALLAH. JUSTERU, SAYA MENYERU AGAR SETIAP LAPISAN WARGA ANGKATAN TENTERA MALAYSIA, BERGANDING BAHU DAN BERDIRI TEGUH BERSAMA-SAMA SAYA UNTUK MEMPERKASAKAN SEGALA NILAI TERAS YANG DIPERLUKAN UNTUK MEWUJUDKAN SEBUAH ORGANISASI YANG SENTIASA DIHORMATI OLEH RAKYAT MALAYSIA, DAN DISEGANI RAKAN SERANTAU MAHUPUN ANTARABANGSA.

FOKUS TERAJU KEPIMPINAN ANGKATAN TENTERA MALAYSIA AMAT JELAS BAHAWA USAHA MEMPERTINGKATKAN KEUPAYAAN DAN KESIAPSIAGAAN ANGKATAN INI MESTILAH MENJADI KEUTAMAAN DAN SELARI DENGAN LANDSKAP GEO-POLITIK DAN STRATEGIK ANTARABANGSA, LEBIH-LEBIH LAGI DALAM KEPESATAN TEKNOLOGI MASA KINI KHUSUSNYA DI BIDANG TEKNOLOGI

MAKLUMAT. SUDAH SEMESTINYA, PENGUKUHAN PERTAHANAN SECARA '**SPEKTRUM PENUH**' ATAU **FULL SPECTRUM** MAMPU MEMBERIKAN PERLINDUNGAN BERKESAN TERHADAP ANCAMAN KETENTERAAN DARIPADA PELBAGAI DIMENSI; BAIK PADA MASA KINI MAHUPUN DI MASA HADAPAN. WALAUPUN RANTAU ASIA TENGGARA KINI NAMPAK AMAN DARI SEBARANG **ANCAMAN BERBENTUK TRADISIONAL**, NAMUN BEBERAPA ISU DALAMAN SERTA LUARAN DILIHAT MAMPU MENCETUSKAN KONFLIK BAHARU PADA BILA-BILA MASA. OLEH YANG DEMIKIAN, KITA TIDAK BOLEH LEKA DIBUAI DENGAN KEAMANAN YANG DIKECAPI PADA HARI INI TANPA BERBUAT APA-APA. KITA HENDAKLAH SENTIASA PEKA TERHADAP GEO-POLITIK SERANTAU, SENSITIF TERHADAP FENOMENA PERSEKITARAN KESEIMBANGAN KUASA DENGAN MENGAMBIL KIRA KEADAAN SALING MEMERLUKAN YANG WUJUD DI KALANGAN NEGARA-NEGARA DI RANTAU INI SERTA KUASA-KUASA BESAR DUNIA. SELAIN ITU, PENINGKATAN **ANCAMAN BUKAN TRADISIONAL** YANG BERBENTUK MILITAN JUGA PERLU DIBERI PERHATIAN SEWAJARNYA. KECENDERUNGAN PIHAK YANG SENTIASA MELAKUKAN KEGIATAN SEPERTI KEGANASAN, AKTIVITI LINTAS SEMPADAN, MENGGUGAT KETENTERAMAN AWAM, KESAN PASCA BENCANA ALAM SERTA GEJALA-GEJALA SOSIAL PERLU DIBERI PERHATIAN KERANA MAMPU MENGGUGAT KESTABILAN NEGARA SERTA MENDEDAHKAN NEGARA KEPADA CAMPUR TANGAN PIHAK LUAR. KEPERIHATINAN KITA TERHADAP ISU-ISU INI AKAN MEMASTIKAN KEDAULATAN NEGARA SENTIASA TERJAMIN DAN TERPELIHARA.

SAUDARA DAN SAUDARI YANG SAYA HORMATI SEKALIAN,

KESEMUA PERKARA YANG TELAH SAYA MAKLUMKAN TADI ADALAH CIRI-CIRI PERSEKITARAN YANG WUJUD SEKARANG DAN PERLU KITA SEMUA HARUNGI BERSAMA SEBAGAI SEBUAH ANGKATAN YANG MENJADI PERISAI PERTAHANAN NEGARA. DI SAMPING ITU, SEMPADAN DI ANTARA ANCAMAN TRADISIONAL DAN BUKAN TRADISIONAL JUGA SEMAKIN KABUR. OLEH YANG DEMIKIAN, SETIAP PERUBAHAN YANG BERLAKU MASA KINI PERLU DIHADAPI SECARA KERJASAMA PELBAGAI AGENSI DAN INI MUNGKIN AKAN MENIMBULKAN BANYAK CABARAN KEPADA KITA. KEADAAN INI MUNGKIN AKAN MENINGKATKAN CABARAN KEPADA ANGKATAN TENTERA MALAYSIA DENGAN KEDUDUKAN EKONOMI NEGARA DAN JUGA EKONOMI GLOBAL YANG SEDANG MELANDA MASA KINI; DI SAMPING FENOMENA “**PENINGKATAN KETEGANGAN**” ATAU ***ESCALATION OF TENSION*** DI RANTAU SEBELAH TIMUR DAN TIMUR TENGAH YANG SEMAKIN KETARA. KEADAAN YANG KOMPLEKS DAN TIDAK MENYEBELAHI KITA INI, MEMBERI JUSTIFIKASI KEPADA ANGKATAN TENTERA MALAYSIA UNTUK MENINGKATKAN LAGI TAHAP KESIAPSIAGAAN SERTA KEUPAYAAN MENANGANI SEBARANG KEMUNGKINAN MELALUI RENSPONS YANG PANTAS, TEPAT DAN EFEKTIF SETELAH OPSYEN DIPLOMASI PERTAHANAN YANG PROAKTIF MENEMUI KEGAGALAN.

JUSTERU, ANGKATAN TENTERA MALAYSIA AKAN TERUS MEMPERTINGKATKAN ILTIZAM DALAM SEGENAP ASPEK UNTUK MEMPERTAHANKAN KEDAULATAN PERBATASAN NEGARA; BAIK DI DARATAN, LAUTAN MAHUPUN RUANG UDARA DARIPADA SEBARANG ANCAMAN ATAU PENCEROBOHAN ANASIR LUAR. AMANAH DAN TANGGUNGJAWAB INI AKAN SENTIASA DIBERI KEUTAMAAN DAN DILAKSANAKAN SECARA PROFESSIONAL, TEKAD DAN PENUH KOMITMEN. TAHAP KESIAGAAN YANG TINGGI JUGA AKAN WUJUD

DARI LATIHAN YANG MANTAP DAN BERKESAN, SERTA PERALATAN DAN PERSENJATAAN CANGGIH YANG MEMENUHI KEPERLUAN PERTAHANAN SEMASA. DI SAMPING ITU JUGA, ANGKATAN TENTERA MALAYSIA AKAN SENTIASA BERSEDIA MEMBANTU AGENSI-AGENCI KESELAMATAN LAIN DAN PIHAK BERKUASA AWAM DALAM MEMELIHARA KETENTERAMAN AWAM SERTA MEMBERI BANTUAN SEMASA BERLAKUNYA BENCANA ALAM DI SELURUH NEGARA.

PARA PERWIRA, BINTARA, PETANDA DAN PERAJURIT YANG SAYA HORMATI SEKALIAN,

BERDASARKAN KRITERIA-KRITERIA ATAU HURAIAN YANG TELAH SAYA NYATAKAN, PERTAHANAN DAN KESELAMATAN NEGARA INI SECARA JELAS BERGANTUNG KEPADA SEBUAH ANGKATAN TENTERA YANG KREDIBEL, RESPONSIF, DINAMIK DAN MAMPU MENGEKSPLOITASI TEKNOLOGI SERTA DIANGGOTAI OLEH WARGA YANG BANGGA UNTUK BERKHIDMAT DEMI AGAMA, BANGSA DAN NEGARA. SELAIN DARIPADA MENYEDIAKAN ASPEK-ASPEK YANG BOLEH DILIHAT DENGAN MATA KASAR, ANGKATAN TENTERA MALAYSIA PERLU MENENTUKAN BAHAWA SIASAH WARGANYA DIPERKASAKAN MELALUI PENINGKATAN TAHAP KEPUASAN BERKHIDMAT UNTUK NEGARA DAN JUGA PELUANG UNTUK MEMPERBAIKI DIRI SENDIRI MELALUI PROGRAM-PROGRAM ILMU KEAGAMAAN DAN KETENTERAAN.

SEHUBUNGAN ITU, ADALAH AMAT PENTING UNTUK ANGKATAN TENTERA MALAYSIA MENCAPAI KESEIMBANGAN DALAM ELEMEN **MANUSIA, MESIN DAN KAEDAH** ATAU **MAN, MACHINE AND METHOD** BAGI MENENTUKAN RESPONS YANG HOLISTIK, BERSEPADU, BERKESAN DAN MENYELURUH. TANPA KESINAMBUNGAN INI, SUDAH

PASTI KITA TIDAK MAMPU MENCAPAI SEGALA MATLAMAT YANG DIHASRATKAN. PERLU DITEGASKAN JUGA BAHAWA ELEMEN **MANUSIA (MAN)** IAITU SETIAP DARIPADA SAUDARA DAN SAUDARI MERUPAKAN ELEMEN YANG PALING UTAMA DALAM ANGKATAN TENTERA YANG UNGGUL INI. TANPA SOKONGAN YANG PADU DARIPADA SAUDARA DAN SAUDARI, ANGKATAN TENTERA MALAYSIA TIDAK AKAN DAPAT MENCAPAI SEGALA MATLAMAT YANG TELAH DITETAPKAN. JUSTERU ITU, BAGI MEMASTIKAN KEPENTINGAN AGAMA, BANGSA DAN NEGARA SEBAGAI SATU KEUTAMAAN MUTLAK, SERTA DEMI KELANGSUNGAN KESEJAHTERAAN DAN KECEMERLANGAN ANGKATAN TENTERA MALAYSIA, EMPAT ASPEK BERIKUT AKAN SAYA JADIKAN TONGGAK PEMERINTAHAN SAYA:

TONGGAK PERTAMA: ANGKATAN YANG PROFESIONAL

DEWASA INI, CABARAN DAN ANCAMAN DARI PELBAGAI SPEKTRUM PERLU DIHADAPI OLEH ANGKATAN TENTERA MALAYSIA SECARA PANTAS, PROFESIONAL DAN EFEKTIF. SETIAP CABARAN YANG DATANG HARUS DITANGANI SEPENUHNYA KERANA KEYAKINAN RAKYAT TERHADAP ORGANISASI INI AMAT TINGGI DAN RAKYAT MENAGIHKAN KEAMANAN YANG TERJAMIN SECARA BERTERUSAN. OLEH ITU, TONGGAK INI PERLU DIGEMBLENGKAN SECARA KESEPADUAN OLEH SETIAP PERINGKAT PEMERINTAHAN UNTUK BERUSAHA MENCAPAI KECEMERLANGAN DALAM SETIAP AMANAH TUGAS YANG DIPERTANGGUNGJAWABKAN.

ANGKATAN YANG PROFESIONAL MEMERLUKAN KOMITMEN SEMUA PIHAK BERMULA DARI ANGGOTA YANG BERPANGKAT PALING RENDAH HINGGALAH PEMERINTAHAN TERTINGGI. INI PENTING BAGI MEMPERLENGKAPKAN KEMAMPUAN DIRI DAN RAKAN

SEPASUKAN DALAM ILMU PENGETAHUAN, BERFIKIRAN MATANG DAN BERKEMAHIRAN TINGGI AGAR MAMPU MENGUKUHKAN KEYAKINAN DIRI DAN PASUKAN DALAM MENGHADAPI PELBAGAI ANCAMAN DAN CABARAN. DENGAN SOKONGAN PERUNTUKAN KEWANGAN DAN PENYEDIAAN PRASARANA TERBAIK DARI PIHAK KERAJAAN, KITA AKAN BERSAMA-SAMA MEREALISASIKAN KETUMBUKAN INI KE ARAH KEMODENAN DAN BERKEBOLEHAN DALAM APA JUA BIDANG PENUGASAN.

TONGGAK KEDUA: KETUMBUKAN YANG SIAP SIAGA

ANGKATAN TENTERA MALAYSIA PERLU BERSIAP SEDIA SEBILANG MASA UNTUK MENGHADAPI SEBARANG BENTUK ANCAMAN DEMI MEMPERTAHANKAN KEDAULATAN DAN KESEJAHTERAAN NEGARA TERCINTA. HASRAT INI MEMERLUKAN SETIAP KOMPONEN DALAM ANGKATAN TENTERA UNTUK SENTIASA MEMPERTINGKATKAN KESIAGAANNYA BAGI MENGHADAPI CABARAN, MENGEKALKAN KEUPAYAAN DAN JUGA SETIAP KEMUNGKINAN YANG AKAN BERLAKU. KEUPAYAAN YANG DIBINA TIDAK AKAN KEKAL SELAMANYA JIKA KITA TIDAK BERUSAHA GIGIH DAN BERTERUSAN. DALAM HAL INI, ANGKATAN TENTERA MALAYSIA AKAN KONSISTEN DALAM USAHA UNTUK MEMBANGUNKAN ANGKATANNYA BERPANDUKAN *BLUEPRINT 4D MAF* ATAU '***FOURTH DIMENSION MALAYSIAN ARMED FORCES***' YANG DIPERHALUSI SECARA DINAMIK DARI ASPEK KEPERLUAN YANG SELARI DENGAN TEKNOLOGI DAN KEMAMPUAN PERUNTUKAN KEWANGAN. PEMBANGUNAN INI AKAN DIDOKONG OLEH RANCANGAN PEMBANGUNAN YANG TELAH DIGUBAL KHAS OLEH SETIAP PERKHIDMATAN MENGIKUT KEPERLUAN SEMASA DAN MENDATANG.

KESEMUA USAHA INI BERMATLAMAT UNTUK MEMBOLEHKAN ORGANISASI YANG UNGGUL INI MEMBERI RESPONS TERBAIK DALAM PELBAGAI PERSEKITARAN; BAIK DI DARATAN, LAUTAN, UDARA DAN JUGA RUANG SIBER. DALAM PADA ITU, SASARAN RANCANGAN PEMBANGUNAN 4D MAF UNTUK MENJADIKAN ANGKATAN TENTERA MALAYSIA SEBAGAI SEBUAH **ANGKATAN OBJEKTIF (OBJECTIVE FORCE)** YANG MAMPU BEROPERASI DI DALAM PELBAGAI SPEKTRUM PEPERANGAN AKAN TERUS DIPERKASAKAN. NAMUN, IA PERLU DILAKSANAKAN SECARA REALISTIK DAN BERPERINGKAT DAN BERKESINAMBUNGAN MENGAMBIL KIRA KEDUDUKAN KEWANGAN NEGARA DAN JUGA KEPERLUAN SEMASA YANG LAIN. KEPERLUAN PERALATAN, PERSENJATAAN DAN LATIHAN TERMODEN JUGA PERLU DISELARASKAN AGAR PERUNTUKAN YANG DISEDIAKAN DIGUNAKAN SECARA OPTIMUM DAN MENUTUP RUANG-RUANG PEMBAZIRAN. DI SAMPING ITU, ANGKATAN TENTERA MALAYSIA AKAN BERUSAHA UNTUK MEMPERTINGKATKAN SEMUA KOMPONEN **“FORCE-IN-BEING”** IAITU KETUMBUKAN YANG SEDIA ADA, AGAR IA MAMPU MENINGKATKAN LAGI TAHAP KESIAGAAN ANGKATAN TENTERA KITA SECARA KESELURUHANNYA.

TONGGAK KETIGA: KEUTUHAN ORGANISASI

KEUTUHAN ORGANISASI AMAT DIPERLUKAN BAGI MEMPERKUKUHKAN KESATUAN DAN PERPADUAN DI KALANGAN WARGA ANGKATAN TENTERA MALAYSIA. SEBAGAI SEBUAH ORGANISASI YANG EKSKLUSIF LAGI PROFESIONAL, ANGKATAN TENTERA MALAYSIA SENTIASA BERUSAHA UNTUK MEMPERTINGKATKAN KEUPAYAAN SERTA KREDIBILITINYA DALAM SEMUA ASPEK UNTUK MELAKSANAKAN TUGAS DAN

TANGGUNGJAWAB YANG DIAMANAHKAN DENGAN SEBAIK YANG MUNGKIN. OLEH ITU, SETIAP WARGA ANGKATAN TENTERA MALAYSIA HARUSLAH **SEDERAP MELANGKAH**, BERGANDING BAHU ANTARA SATU SAMA YANG LAIN, DAN BERSEDIA UNTUK MENCURAH BAKTI DALAM APA JUA KEADAAN DEMI KELANGSUNGAN DAN KECEMERLANGAN ORGANISASI.

SEMUA PEGAWAI DAN ANGGOTA DARI KETIGA-TIGA CABANG PERKHIDMATAN ANGKATAN TENTERA MALAYSIA JUGA PERLU MENGHAYATI BUDAYA “***SENSE OF BELONGING***” DAN “***SENSE OF OWNERSHIP***” TERHADAP ANGKATAN TENTERA MALAYSIA SAMBIL MENGGEMBLENG SERTA MENYATUKAN USAHA DAN TENAGA MASING-MASING MENANGANI APA JUA ANCAMAN DI MANA KITA PERLU SEDAR BAHAWA ANCAMAN PERTAMA ADALAH DIRI KITA SENDIRI. SEGALA KEKUATAN MAHUPUN KELEMAHAN BERMULA DI HATI DAN SETERUSNYA MEMBENTUK INTEGRITI DIRI DAN ORGANISASI. DENGAN KEKUATAN INDIVIDU DAN KESATUANNYA, KITA MAMPU BERJUANG UNTUK MEMBANTU MENGHADAPI CABARAN YANG MENDEPANI NEGARA SECARA AMNYA DAN ANGKATAN TENTERA MALAYSIA SECARA KHUSUSNYA.

TONGGAK KEEMPAT: MEMPERKASAKAN KUALITI HIDUP

DALAM MEMPERKASAKAN KUALITI HIDUP, ANGKATAN TENTERA MALAYSIA AMAT MENITIKBERATKAN KEBAJIKAN SETIAP ANGGOTA DAN KELUARGANYA SERTA GOLONGAN VETERAN. KUALITI HIDUP YANG TERBAIK MENDORONG SETIAP WARGA LEBIH FOKUS KEPADA KERJAYA KETENTERAAN. SEHUBUNGAN DENGAN ITU, SAYA BERTEKAD UNTUK MENERUSKAN SEGALA INISIATIF DAN USAHA-USAHA YANG TELAH DAN SEDANG DILAKSANAKAN UNTUK

MENINGKATKAN KUALITI HIDUP INI. ANGKATAN TENTERA MALAYSIA, MELALUI INISIATIF-INISIATIF YANG DILAKSANAKAN AKAN MEMBOLEHKAN SETIAP ANGGOTA MEMILIKI SEBUAH RUMAH SEBELUM MENAMATKAN PERKHIDMATAN. DI SAMPING ITU, INISIATIF INI JUGA AKAN TURUT MELIBATKAN **RUMAH IDAMAN** UNTUK GOLONGAN VETERAN, PEMBINAAN KEM-KEM SERTA RUMAH KELUARGA BARU, DAN PENYELENGGARAAN TERHADAP KEMUDAHAN SERTA FASILITAS ASAS; YANG MANA KESEMUA INI AKAN TERUS MENJADI KEUTAMAAN ANGKATAN TENTERA KITA. DALAM PADA ITU, SENGGARAAN BERTERUSAN DAN BERKUALITI JUGA AKAN MENGHASILKAN PENJIMATAN BAGI PENGURUSAN KEWANGAN JANGKA PANJANG. SIKAP AMBIL BERAT DAN MEMELIHARA KEMUDAHAN YANG DISEDIAKAN AGAR SENTIASA TERPELIHARA, DAPAT MENGURANGKAN KOS PENYELENGGARAAN YANG AMAT DITAGIH DARI SETIAP WARGA. KEPERLUAN ASAS YANG LEBIH BERKUALITI DAN KONDUSIF AKAN MENINGKATKAN MORAL SETIAP WARGA ANGKATAN TENTERA MALAYSIA; KHUSUSNYA DARI SEGI CABARAN LOJISTIK DAN PRASARANA, LEBIH-LEBIH LAGI UNTUK KESELESAAN HIDUP KELUARGA. DI SAMPING ITU, PELUANG DARI ASPEK KENAIKAN PANGKAT, KEMUDAHAN PENGAJIAN TINGGI SEPERTI '**K-FORCE**', PENINGKATAN AKADEMIK KE TAHAP TERTINGGI (PERINGKAT PHD), PERUMAHAN DAN PERUBATAN SERTA EMOLUMEN ATAU FAEDAH BAGI PERSARAAN MAHUPUN PEMBERHENTIAN, JUGA DILAKSANAKAN DEMI KEPENTINGAN MASA DEPAN ANGGOTA DAN KELUARGA.

BAGI PARA VETERAN SERTA KELUARGA MEREKA PULA, YANG MANA SAUDARA DAN SAUDARI YANG GAGAH INI AKAN ALAMI SENDIRI NANTI, PASTINYA AKAN MENIKMATI PELBAGAI KEMUDAHAN SERTA BANTUAN DISEDIAKAN TERMASUKLAH KEMUDAHAN

PERUBATAN SECARA PERCUMA, ELAUN DAN BIASISWA DARI ANAK PRA-SEKOLAH HINGGALAH KE TAHAP PENGAJIAN TINGGI, DAN SEBAGAINYA. KESEMUA INI DILAKSANAKAN UNTUK MEMBANTU GOLONGAN VETERAN YANG TIDAK BERPENGEN; YANG MANA SEDIKIT SEBANYAK DAPAT MENINGKATKAN TARAF SOSIO-EKONOMI MEREKA. DEMI MENIKMATI HIDUP YANG BERKUALITI, SEHARUSNYA MASA UNTUK PENUGASAN, LATIHAN, PENTADBIRAN DAN KELUARGA DIOPTIMUMKAN SEPENUHNYA OLEH SETIAP WARGA ANGKATAN TENTERA MALAYSIA. DENGAN MENYEMARAKKAN PENGURUSAN MASA YANG BERKUALITI SELARAS DENGAN FALSAFAH '**QUALITY TIME**' ATAU MASA BERKUALITI, BARULAH KITA DAPAT MENCAPAI KESEIMBANGAN CARA HIDUP SECARA INDIVIDU DAN JUGA BERKELUARGA.

PARA PERWIRA, BINTARA, PERAJURIT DAN PETANDA YANG SAYA KASIH SEKALIAN,

BERASASKAN KEPADA KEEMPAT-EMPAT TONGGAK YANG TELAH SAYA UTARAKAN, SAYA AMAT YAKIN BAHAWA DENGAN SOKONGAN SERTA PENGORBANAN TUAN-TUAN DAN PUAN-PUAN, ANGKATAN TENTERA MALAYSIA AKAN BERUPAYA UNTUK MENEMPA KEJAYAAN YANG BERTERUSAN SERTA KEKAL RELEVAN KE ARAH MEMARTABATKAN KEDAULATAN NEGARA. TUGAS KITA SEMUA ADALAH UNTUK TERUS MEMBANGUNKAN KEUPAYAAN, MEMPERKASAKAN IMEJ DAN MENINGKATKAN KEYAKINAN RAKYAT TERHADAP ANGKATAN TENTERA MALAYSIA PADA SEBILANG MASA. SEBAGAI "**PERISAI NEGARA**", KITA PERLU TERUS MENINGKATKAN LAGI TAHAP PROFESIONALISME DAN MENYEMARAKKAN ILTIZAM UNTUK MEMACU ORGANISASI INI KE TAHAP YANG LEBIH TINGGI.

BAGI MENGAKHIRI AMANAT INI, SAYA INGIN MENGULANGI JANJI BAHAWA ANGKATAN INI AKAN SENTIASA MENJUNJUNG TINGGI SUMPAAH TAAT SETIA TERHADAP PERKHIDMATAN DI BAWAH PEMERINTAHAN SERI PADUKA BAGINDA YANG DIPERTUAN AGONG SELAKU PEMERINTAH TERTINGGI ANGKATAN TENTERA MALAYSIA.

KEPADA PIHAK KERAJAAN MALAYSIA, SAYA MEMBERIKAN JAMINAN BAHAWA ANGKATAN TENTERA MALAYSIA AKAN SENTIASA MENGUTAMAKAN PROFESIONALISME DAN AMANAH DALAM MELAKSANAKAN TUGAS DAN TANGGUNGJAWABNYA. ANGKATAN TENTERA MALAYSIA AKAN JUGA BERSIAP SIAGA DALAM MEMASTIKAN **KESELAMATAN DAN PERTAHANAN** NEGARA INI BERADA DALAM KEADAAN TERTINGGI, TERMASUKLAH MELALUI KERJASAMA ANTARA NEGARA-NEGARA ASEAN. APATAH LAGI, KEDUA-DUA ASPEK TERSEBUT ADALAH SALAH SATU KEPENTINGAN STRATEGIK YANG PERLU DIPELIHARA DAN DIPERKASAKAN DALAM MEMASTIKAN KESTABILAN SERTA KEMAKMURAN EKONOMI NEGARA. JAMINAN INI, SUDAH TENTUNYA MELANGKAUI FAHAMAN DAN PEGANGAN, KERANA AKHIRNYA KEUTAMAAN ANGKATAN INI ADALAH UNTUK MEMASTIKAN KEDAULATAN DAN KEMERDEKAAN IBU PERTIWI INI KEKAL SELAMANYA DAN MENJADIKAN ANGKATAN TENTERA MALAYSIA SEBAGAI SEBUAH KETUMBUKAN YANG DIHORMATI DAN DISEGANI, SERTA DAPAT DIWARISKAN KEPADA GENERASI AKAN DATANG.

AKHIR KATA, SEMOGA ALLAH AZZA WA JALLA MEMBERKATI USAHA-USAHA KITA, MEMBERI HIDAYAH KEPADA KITA SERTA MENUNJUKKAN KITA KE JALAN YANG LURUS '**IHDINAS SIRATAL MUSTAQIM**'.

SEKIAN, WABILLAHİ TAUFİK WAL HİDAYAH
WASSALAMUALAIKUM WARAHMATULLAHİ WABARAKATUH.

“SENTIASA BERSEPADU”

.....
JENERAL TAN SRI DATO' SERI PANGLIMA HAJI ZULKIFLI BIN
HAJI ZAINAL ABIDIN

PANGLIMA ANGKATAN TENTERA

6 JULAI 2018

THT ATM